

直齋書錄解題
七

目40
5975
49-7

直齋書錄解題卷十

宋 陳 振 孫 撰

法家類

管子二十四卷

案隋唐經籍志
俱作十九卷

齊相管夷吾撰唐房元齡注案漢志管子八十六篇

列於道家隋唐志著之法家之首今篇數與漢志合

而卷視隋唐爲多管子似非法家而世皆稱管商豈

以其操術用心之同故耶然以爲道則不類今從隋

唐志



商子五卷

秦相衛公孫鞅撰或稱商君者其封邑也漢志二十九篇今二十六篇又亡其一

慎子一卷

趙人慎到撰漢志四十二篇先於申韓稱之唐志十卷滕輔注今麻沙刻本纔五篇固非全書也案莊周荀卿書皆稱田駢慎到到趙人駢齊人見於史記列傳今中興館閣書目乃曰瀏陽人瀏陽在今潭州吳時始置縣與趙南北了不相涉蓋据書坊所稱不知

何謂也崇文目總言三十七篇

韓子二十卷

韓諸公子韓非撰漢志五十五篇今同所謂孤憤說難之屬皆在焉

名家類

公孫龍子三卷

趙人公孫龍為白馬非馬堅白之辨者也其為說淺

陋迂僻不知何以惑當時之聽漢志十四篇

案漢書藝文志

六十四篇此云十四篇誤

今書六篇首敘孔穿事文意重複

鄧析子二卷

鄭人鄧析左氏傳鄭駟歛嗣子太叔為政殺鄧析而用其竹刑即此人也列子荀子以為子產所殺顏師古辨之矣

尹文子三卷

案宋史藝文志作一卷文獻通攷作二卷

齊人尹文撰漢志齊宣王時人先公孫龍今本稱仲長氏撰定魏黃初末得於繆熙伯又言與宋鉞田駢同學於公孫龍則不然也龍書稱尹文乃借文對齊宣王語以難孔穿其人當在龍先班志言之是矣仲

長氏即統也耶熙伯名襲

人物志三卷

案劉劭人物志止上中下三卷原本作二十卷誤今改正

魏散騎常侍邯鄲劉劭孔才撰梁儒林祭酒燉煌劉昫注梁史無劉昫中興書目云爾晁氏云偽涼人

廣人物志十卷

案唐書藝文志作三卷宋史藝文志作二卷

唐鄉貢進士京兆杜周士撰敘武德至貞元選舉薦進人物事實凡五十五科

墨家類

墨子三卷

宋大夫墨翟撰孟子所謂邪說詖行與楊朱同科者也韓吏部推尊孟氏而讀墨一章乃謂孔墨相爲用何哉漢志七十一篇館閣書目有十五卷六十一篇者多訛脫不相聯屬又二本止存十三篇者當是此本也方楊墨之盛獨一孟子訟言非之諄諄焉惟恐不勝今楊朱書不傳列子僅存其餘墨氏書傳於世者亦止於此孟子越百世益光明遂能上配孔氏與論語並行異端之學安能抗吾道哉

從橫家類

鬼谷子三卷

案唐書藝文志作二卷

戰國時蘇秦張儀所師事者號鬼谷先生其地在潁川陽城名氏不傳於世此書漢志亦無有隋唐志始見之唐志則直以爲蘇秦撰不可攷也隋志有皇甫謐樂壹二家注今本稱陶宏景注

案徐廣曰潁川陽城有鬼谷注其書

者樂壹皇甫謐陶宏景尹知章

農家類

農家者流本於農稷之官勤耕桑以足衣食神農之言許行學之漢世野老之書不傳於後而

唐志著錄雜以歲時月令及相牛馬諸書是猶薄有關於農者至於錢譜相貝鷹鶴之屬於農何與焉今既各從其類而花果栽植之事猶以農圖一體附見於此其實則浮末之病本者也

齊民要術十卷

後魏高陽太守賈思勰撰起自耕農終於醯醢資生之業靡不畢書凡九十三篇其曰治生之道不仕則農蓋名言也

山居要術三卷

稱王昉撰館閣書目作王旻皆莫知何時人也

四時纂要五卷

案宋史藝文志作十卷

唐韓諤撰雖曰歲時之書然皆為農事也

蠶書二卷

案宋史藝文志作三卷

孫光憲撰光憲事跡見小說類

秦少游蠶書一卷

見少游淮海集第六卷序略曰予閒居婦善蠶從婦論蠶作蠶書考之禹貢揚梁幽雍不貢繭物兗篚織文徐篚元織縞荆篚元纁璣組豫篚織纈青篚麩絲

皆繭物也而桑土既蠶獨言於堯然則九州蠶事堯為最乎予游濟河之間見蠶者豫事時作一婦不蠶比屋詈之故知堯人可為蠶師今予所書有與吳中蠶家不同者皆得之堯人也

案此條文獻通考引陳氏之言原本脫今補入

禾譜五卷

宣德郎溫陵曾安止移忠撰東坡所為賦秧馬歌也謂禾譜文既溫雅事亦詳實惜其不譜農器故以此歌附之安止熙寧進士嘗為彭澤令右丞黃履安中誌其墓

農器譜三卷續二卷

耒陽令曾之謹撰安止之姪孫也追述東坡作歌之意為此編周益公為之序陸務觀亦作詩題其後

農書三卷

稱西山隱居全真子陳莛撰

案農書係陳莛撰原本誤作雩今改正

未

詳何人其書曰田曰牛曰蠶洪慶善為之後序

耕桑治生要備二卷

左宣教郎通判橫州何先覺撰紹興癸酉序

耕織圖一卷

於潛令鄞樓璠壽王撰玫瑰參政之伯父也

竹譜一卷

案宋史藝文志作三卷

武昌戴凱之慶預撰皆四字語

筍譜一卷

僧贊寧撰

案晁公武讀書志作僧惠崇撰

夢溪忘懷錄三卷

沈括存中撰自稱夢溪丈人括坐永樂事閒廢晚歲乃以光祿卿分司卜居京口之夢溪有水竹山林之適少有懷山錄可資居山之樂者輒記之自謂今可

忘于懷矣故名忘懷錄

越中牡丹花品二卷

僧仲休撰其序言越之所好尚惟牡丹其絕麗者三十二種始乎郡齋豪家名族梵宇道宮池臺水榭植之無間來賞花者不間親疎謂之看花局澤國此月多有輕雲微雨謂之養花天里語曰彈琴種花陪酒陪歌末稱丙戌歲八月十五日移花日序丙戌者當是雍熙三年也越在國初繁富如此殆不減洛中今民貧至骨種花之風遂絕何今昔之異耶其故有二

一者鏡湖爲田歲多不登二者和買土著數倍常賦
勢不得不貧也

牡丹譜一卷

歐陽修撰少年爲河南從事目擊洛花之盛遂爲此
譜蔡君謨書之盛行於世

冀王宮花品一卷

題景祐元年滄州觀察使記以五十種分爲三等九
品而潛溪緋平頭紫居正一品姚黃反居其次不可
曉也

吳中花品一卷

慶歷乙酉趙郡李英述皆出洛陽花品之外者以今
日吳中論之雖曰植花未能如承平之盛也

花譜二卷

案宋史藝文
志作一卷

滎陽張岫子堅撰以花有千葉多葉黃紅紫白之別
類以爲譜凡千葉五十八品多葉六十二品又以芍
藥附其末岫與其弟嶠子望同登進士第嶠嘗從邵
康節學

牡丹芍藥花品七卷

不著名氏錄歐公及仲休等諸家牡丹譜孔常甫芍
藥譜共為一編

芍藥譜一卷

中書舍人清江劉攽貢父撰

芍藥圖序一卷

待制新塗孔武仲常甫撰

案孔武仲新塗人原本誤作新塗今改正

芍藥譜一卷

知江都縣王觀通叟撰三家皆述維揚所產花之盛

荔枝譜一卷

端明殿學士莆田蔡襄君謨撰且書而刻之與牡丹
記並行閩無佳石以板刊歲久地又濕皆蠹朽至今
猶藏其家而字多不完可惜也

荔枝故事一卷

無名氏

案晁公武讀書志亦作蔡襄撰

增城荔枝譜一卷

亦無名氏其序言福唐人熙寧九年承乏增城多植
荔枝蓋非嶠南之火山寔類吾鄉之晚熟搜境內所
出得百餘種其初亦得閩中佳種植之故為是譜

四時栽接花果圖一卷

無名氏

桐譜一卷

銅陵逸民陳翥撰皇祐元年序

何首烏傳一卷

初見唐李翱集今後人增廣之耳

海棠記一卷

吳人沈立撰

菊譜一卷

彭城劉蒙撰凡三十五品

菊譜一卷

史正志志道撰孝廟朝爲發運使者也

范村梅菊譜二卷

范成大至能撰有園在居第之側號范村

橘錄三卷

知温州延安韓彥直子温撰世忠長子也

糖霜譜一卷

遂寧王灼晦叔撰言四方所產遂寧爲冠灼自號頤

堂

蟹譜二卷

稱怪山傅肱子翼撰嘉祐四年序怪山者越之飛來山也

蟹略四卷

高似孫續古撰

雜家類

呂氏春秋二十六卷

案唐宋藝文志俱作二十六卷原本作三十六卷誤今改正

秦相呂不韋撰後漢高誘注其書有十二紀八覽六

論十二紀者即今禮記之月令也

淮南鴻烈解二十一卷

漢淮南王安與賓客撰後漢太尉許慎叔重注案唐志又有高誘注今本既題許慎記上而詳序文則是高誘不可曉也序言自誘之少從同縣盧君受其句讀盧君者植也與之同縣則誘乃涿郡人又言是建安十年辟司空掾東郡濮陽令十七年遷監河東則誘乃漢末人其出處略可見

子華子十卷

稱晉人程本字子華與孔子同時考前世史志及諸家書目並無此書蓋假託也館閣書目辨之當矣家語有孔子遇程子傾蓋贈束帛之事而莊子亦載子華子見昭僖侯一則此其姓字之所從出昭僖與孔子不同時也莊子固寓言而家語亦未可考信班固古今人表亦無之使果有其人遇合於夫子班固豈應見遺也其文不古然亦有可觀者當出於近世能言之流爲此以玩世爾

論衡三十卷

漢上虞王充仲任撰肅宗時人仕爲州從事治中初著書八十五篇釋物類同異正時俗嫌疑蔡邕王朗初傳之時以爲不見異人當得異書自今觀之亦未見其奇也

女誡一卷

漢曹世叔妻班昭撰固之妹也俗號女孝經

潛夫論十卷

漢安定王符節信撰

風俗通義十卷

漢泰山太守汝南應劭仲遠撰唐志二十卷今惟存十卷餘略見庾仲容子鈔

蔣子萬機論二卷

魏太尉平河蔣濟子通撰案館閣書目卷五十五篇今惟十五篇恐非全書也

博物志十卷

案此書別有注本互見小說家

晉司空范陽張華茂先撰多奇聞異事華能辨龍鮓識劍氣其學固然也

古今注三卷

晉太傅丞崔豹正熊撰

孫子十卷

題晉孫綽興公撰恐依託唐志及中興書目並無之余從程文簡家借錄

劉子五卷

劉晝孔昭撰播州錄事叅軍袁孝政為序

案劉子序係袁孝政

作原本脫姓今補入

凡五十五篇案唐志十卷劉勰撰今序云

書傷已不遇天下陵遲播遷江表故作此書時人莫知謂為劉勰或曰劉歆劉孝標作孝政之言云爾終

不知書為何代人其書近出傳記無稱莫詳其始末不知何以知其名書而字孔昭也

金樓子十卷

梁元帝繹世誠為湘東王時所述也雜記古今聞見末一卷為自序

瑞應圖十卷

不著名氏案唐志有孫柔之瑞應圖記熊理瑞應圖譜各三卷案唐書藝文志作熊理瑞應圖讚三卷顧野王符瑞圖十卷又祥瑞圖十卷今此書名與孫熊同而卷數與顧合

意其野王書也其間亦多援孫氏以為注中興書目有符瑞圖二卷定著為野王又有瑞應圖十卷稱不知作者載天地瑞應諸物以類分門今書正爾未知果野王否又云或題王昌齡至李淑書目又直以為孫柔之其為昌齡或不可知而此書多引孫氏則決非柔之矣又恐李氏書別一家也

子鈔三十卷

梁尚書左丞潁川庾仲容子仲撰所取諸子之書白有五家其間頗有與今世見行書不同者而亡者亦

多矣

意林三卷

唐大理評事扶風馬總會元撰以庾鈔增損裁擇爲此書總後宦達嘗副裴晉公平淮西者也

顏氏家訓七卷

北齊黃門侍郎琅邪顏之推撰古今家訓以此爲祖而其書崇尚釋氏故不列於儒家

匡謬正俗八卷

案前第二卷毛詩補音解題所引顏氏糾謬正俗卽此書因避諱匡字改作糾

唐祕書監琅邪顏籀師古撰其子符璽郎揚庭永徵

二年表上之

刊謬正俗跋八卷

莆田鄭樵撰

理道要訣十卷

唐宰相杜佑撰凡三十三篇皆設問答之辭末二卷記古今異制蓋於通典中撮要以便人主觀覽

造化權輿六卷

唐豐王府法曹趙自勗撰天寶七年表上陸農師著埤雅頗採用之其孫務觀嘗兩爲之跋余求之久不

獲己亥歲從吳門天慶道藏中借錄

祝融子兩同書二卷

不著名氏中興書目云唐吳筠撰唐藝文志同但入小說類又案崇文總目以為羅隱撰未詳其書采孔老為內外十篇祝融者謂鬻子為諸子之首也

刊誤二卷

唐國子祭酒李涪撰

資暇集三卷

唐李匡文濟翁撰

兼明書二卷

唐國子太學博士邱光庭撰

蘇氏演義十卷

唐光啓進士武功蘇鶚德祥撰此數書者皆考究書傳訂正名物辨證訛謬有益見聞尤梁谿以家藏本刻之當塗

事始三卷

唐吳王諮議宏文館學士南陽劉存撰

案唐書藝文志劉孝孫房

德懋撰鄭樵通志云皆為王府官以教諸王始學

炙轂子三卷

唐王睿撰以古今注二儀實錄樂府解題等書刪併

為一編

仲蒙子三卷

案宋史藝文志作仲蒙子原本作仲蒙誤今改正

唐校書郎長樂林慎思虔中撰

中華古今注三卷

後唐太學博士馬縞撰蓋推廣崔豹之書也

格言五卷

南唐中書侍郎北海韓熙載叔言撰

化書六卷

南唐宰相廬陵宋齊邱子嵩撰

物類相感志一卷

僧贊寧撰國初名釋也

耄智餘書三卷

太子少保致仕澶淵晁迥德遠撰迥善養生兼通釋

老書年至八十四子孫多聞人

昭德新編一卷

晁迥撰昭德者京師居第坊名也晁氏子孫皆以為

稱

聾隅子二卷

蜀人黃晞撰聾隅其自號也本朝仁宗時人書名獻
欵瓊微論凡十篇

朱景文筆記一卷

翰林學士安陸朱祁子京撰

近事會元五卷

李上友撰自唐武德至周顯德雜事細務皆記之

徽言三卷

司馬光手鈔諸子書題其末曰余此書類舉人所鈔
書然舉人所鈔獵其辭余將鈔覈其意舉人志科名
余志道德其書迂叟年六十八蓋公在相位時也方
機務填委且將屬疾而好學不厭克勤小物如此所
鈔自國語而下六書其目三百一十有二小楷端重
無一筆不謹百世之下使人肅然起敬真蹟藏邵康
節家其諸孫遵守漢嘉從邵氏借刻攜其板歸越今
在其羣從述尊古家

泣岐書三卷

蜀人龍昌期撰稱上昭文相公有後序言求薦進之意

天保正名論八卷

龍昌期撰其學迂僻專非周公妄人也

事物紀原二十卷

不著名氏中興書目十卷開封高承撰元豐中人凡二百七十事今此書多十卷且數百事當是後人廣之耳

孔氏雜說一卷

清江孔平仲毅甫撰

案文獻通攷作孔武仲

晁氏客語一卷

晁說之以道撰

廣川家學三十卷

中書舍人董弅令升撰述其父道之學

石林家訓一卷

葉夢得少蘊撰

石林過庭錄二十七卷

葉夢得與諸子講說者其中子模編輯之

程氏廣訓六卷

中書舍人三衢程俱致道撰

藝苑雌黃二十卷

建安嚴有翼撰大抵辨正訛謬故曰雌黃其日子史傳注詩詞時序名數聲畫器用地理動植神怪雜事卷爲二十條凡四百條硯岡居士唐稷序之有翼嘗分教泉荆二郡

緬素雜記十卷

建安黃朝英士俊撰有陳與者爲之序言甲辰六試

禮部不利蓋政宣中士子也其書亦辨正名物而學頗迂僻言詩芍藥握椒之義鄙褻不典王氏之學前輩以資戲笑而朝英以爲得詩人深意其識可見矣
聖賢眼目一卷

曲阿洪興祖慶善撰摘取經子數十條以已見發明之

義林一卷

眉山程敦厚子山撰其上世東坡外家也子山爲人凶險與眉守邵溥有隙以匹絹爲匿名書誣以罪狀

抵帥蕭振振逮溥繫獄鞫之或教溥一切誣服得不
以鍛鍊死獄上朝議以匿名不當受而制司非得旨
不應擅逮繫郡守遂兩罷之溥雖得弗問而終無以
自明憤訴於天子山之居極壯麗一夕燼於火後附
秦檜至右史後復得罪謫知安遠縣以沒

弟子職等五書一卷

漳州教授張時舉以管子弟子職篇班氏女誡呂氏
鄉約鄉禮司馬氏居家雜儀合爲一編

演蕃露十四卷續六卷

程大昌泰之撰初在館中見蕃露書以爲非說見春
秋類又引古今注晁旒綴玉下垂如繁露然蓋與玉
杯竹林同爲託物名篇可想見也今日演蕃露意古
之蕃露與爾雅釋名廣雅刊誤正俗之類云爾
考古編十卷續編十卷

程大昌撰上自詩書下及史傳世俗雜事有可考見
者皆筆之

楚澤叢語八卷

右迪功郎李著吉先撰不知何人作其書專闢孟子

直齋書錄解題 卷十
三項家達校
紹興中撰進大意以爲王氏之學出於孟氏然王氏
信有罪矣孟氏何與焉此論殆得於晁景迂之微意
容齋隨筆續筆三筆四筆各十六卷五筆十卷

翰林學士鄱陽洪邁景盧撰每編皆有小序五筆未
成書

續顏氏家訓八卷

左朝請大夫李正公撰皆用顏氏篇目而增廣之

習學記言五十卷

寶文閣學士龍泉葉適正則撰自六經諸史子以及

文鑑皆有論說大抵務爲新奇無所蹈襲其文刻削
精工而義理未得爲純明正大也自孔子之外古今
百家隨其淺深咸有遺論無得免者而獨於近世所
傳子華子篤信推崇之以爲真與孔子同時可與六
經並考而不悟其爲僞也且旣曰其書甚古而文與
今人相近則亦知之矣遠自七略下及隋唐國史諸
志李邕鄆諸家書目皆未之有豈不足以驗其非古
出於近世好事能文者之所爲而反謂孟荀以來無
道之者蓋望而棄之也不亦惑乎

直齋書錄解題 卷十
三項家達校
準齋雜說一卷

錢塘吳如愚撰

灌畦暇語一卷

不知作者雜取史傳事略述己意

忘筌書二卷

潘樞子醇撰新安所刻本凡八十二篇與館閣書目諸儒鳴道集及余家寫本篇數皆不同本已見儒家而館目真之雜家者以其多用釋老之說故也今亦別錄於此

袁氏世範三卷

樂清令三衢袁采君載撰

直齋書錄解題卷十

直齋書錄解題卷十一

宋 陳 振 孫 撰

小說家類

神異經一卷

稱東方朔撰張茂先傳

十洲記一卷

亦稱東方朔撰二書詭誕不經皆假託也漢書本傳叙朔之辭末言劉向所錄朔書具是矣世所傳他事皆非也贊又言朔之談諧其事浮淺行於衆庶而後

世好事者因取奇言怪語附著之朔故詳錄焉史家欲祛妄惑可謂明矣

洞冥記四卷拾遺一卷

東漢光祿大夫郭憲子橫撰題漢武別國洞冥記其別錄又於御覽中鈔出然則四卷亦非全書也凡若是者藏書之家備名數而已無之不足為損有之不足為益況於詳畧尤非所計也唐志入神仙家

拾遺記十卷

晉隴西王嘉子年撰蕭綺序錄

名山記一卷

亦稱王子年即前之第十卷

案此句原本誤脫今大據文獻通攷增入

抵皆詭誕嘉符秦時人見晉書藝術傳

殷芸小說十卷

宋殷芸撰邯鄲書目云或題劉餗非也今此書首題秦漢魏晉宋諸帝注云齊殷芸撰非劉餗明矣故其序事止宋初蓋於諸史傳記中鈔集或稱商芸者宣祖廟末祧時避諱也

世說新語三卷叙錄二卷

宋臨川王劉義慶撰梁劉峻孝標注叙錄者近世學士新安汪藻彥章所為也首為考異繼列人物世譜十卷自餘諸家所藏卷第多不同叙錄詳之此本董令升刻之巖州以為晏元獻公手自校定刪去重複者

案叙錄者以下原本脫去今據文獻通攷補入

續齊諧記一卷

梁奉朝請吳均撰齊諧志怪本莊子語也唐志又有東陽無疑齊諧志今不傳此書殆續之者歟

北齊還冤志二卷

顏之推撰

古今同姓名錄一卷

梁元帝撰有陸善經者續之至五代時

朝野僉載一卷

唐司門郎中饒陽張鷟文成撰其書本三十卷

案宋史藝

文志朝野僉載二十卷又僉載補遺三卷文獻通攷止載補遺三卷蓋亦未見全書此云本三十卷疑誤

此特其節畧爾別求之未獲鷟自號浮休子

補江總白猿傳一卷

正齊書金角是卷十一
三項家達校
無名氏歐陽紇者詢之父也詢貌類獼猿蓋嘗與長
孫無忌互相嘲謔矣此傳遂因其嘲廣之以實其事
託言江總必無名子所爲也

冥報記二卷

唐史部尙書京兆唐臨本德撰

劉餗小說三卷

唐右補闕劉餗鼎卿撰

隋唐嘉話一卷

劉餗撰

博異志一卷

稱谷神子不知何人所記初唐及中世事

辨疑志三卷

唐宣武行軍司馬吳郡陸長源撰辨里俗流傳之妄

宣室志十卷

唐史部侍郎常山張讀聖用撰

案文獻通考聖用作聖册

宣室者

漢文帝問鬼神之處也

封氏見聞記二卷

唐史部郎中封演撰前紀典故末及雜事頗有可觀

劉公佳話一卷

唐江陵少尹韋絢文明撰劉公禹錫也絢執誼之子戎幕閒談一卷

韋絢撰爲西川巡官記李文饒所談

聞奇錄一卷

不著名氏當是唐末人

柳常侍言旨一卷

唐柳瑄撰常侍者其世父芳也凡六章末有劉幽求及上清傳

幽閒鼓吹一卷

唐張固撰

甘澤謠一卷

唐刑部郎中袁郊撰所記凡九條咸通戊子自序以其春雨澤應故有甘澤成謠之語遂以名其書

乾膳子三卷

唐温庭筠飛卿撰序言不爵不觥非魚非炙能悅諸心聊甘衆口庶乎乾膳之義膳與饌同字從肉見古禮經

尚書故實一卷

唐李綽撰又名尚書談錄首言賓護尙書河東張公
三代相門謂嘉貞延賞宏靖也宏靖盧龍失御貶賓
客分司綽唐末人未必及宏靖宏靖之後文規次宗
彥遠皆不登八座未詳所謂唐志卽以爲延賞尤不
然

雜纂一卷

唐李商隱義山撰俚俗常談鄙事可資戲笑以類相
從今世所稱殺風景蓋出於此又有別本稍多皆後

人附益

盧氏雜記一卷

唐盧言撰

杜陽雜編三卷

唐武功蘇鶚德祥撰

酉陽雜俎二十卷續十卷

唐太常少卿臨淄段成式柯古撰所記故多譎怪其
標目亦奇詭如天咫玉格壺史貝編尸窆之類成式
文昌之子

廬陵官下記二卷

段成式撰爲吉州刺史時也

唐闕史三卷

唐高彥休撰自號參寥子乾符中人

北里志一卷

唐學士孫榮撰載平康狹邪事

玉泉筆端三卷又別一卷

不著名氏有序中和三年作末有跋云扶風李昭德家藏之書也卽故淮海相公孫又稱黃巢陷洛之明

年跋亦不知何人別一本號玉泉子比此本少數條而多五十二條無序跋錄其所多者爲一卷

雲溪友議十二卷

唐范攄撰自稱五雲溪人咸通時唐志三卷

傳奇六卷

唐裴鉞撰高駢從事也尹師魯初見范文正岳陽樓記曰傳奇體爾然文體隨時要之理勝爲貴文正豈可與傳奇同日語哉蓋一時戲笑之談耳唐志三卷今六卷皆後人以其卷帙多而分之也

三水小牘三卷

唐皇甫牧遵美撰天祐中人三水者安定屬邑也

醉鄉日月三卷

唐皇甫松子奇撰唐人飲酒令此書詳載然今人皆

不能曉也

異聞集十卷

唐屯田員外郎陳翰撰翰唐末人見唐志而第七卷

所載王魁乃本朝事當是後人勦入之耳

卓異記一卷

案原本不著卷數今據宋史藝文志補入

稱李翱撰記當時君臣卓絕盛事或云長城陳翱案

史藝文志既載李翱卓異記又有卓異記一卷題陳翰撰注云一作翱疑一書而誤分為二也

大唐說纂四卷

不著名氏分門類事若世說止有十二門恐非全書

摭言十五卷

唐王定保撰專記進士科名事定保光化三年進士

為吳融子華婿喪亂後入湖南棄其妻弗顧士論不

齒

廣摭言十五卷

鄉貢進士何晦撰案晦原本作臨文獻通攷宋史藝文志俱作晦十國春秋亦云何晦著撫言今改正其序言太歲癸酉下第於金陵鳳臺旅舍癸酉者開寶六年也時江南猶未下晦蓋其國人歟

金華子新編三卷

大理司直劉崇遠撰五代時人記大中以後雜事

耳目記一卷

無名氏邯鄲書目云劉氏撰未詳其名記唐末以後事

唐朝新纂三卷

融州副使石文德撰

豪異秘纂一卷

無名氏所錄五事其扶餘國王一則即所謂虬須客者也

紀聞譚三卷

蜀潘遠撰館閣書曰按李淑作潘遺今考邯鄲書目亦作潘遠其曰遺者本誤也所記隋唐遺事

北夢瑣言三十卷案文獻通攷作二十卷

黃州刺史陵井孫光憲孟文撰載唐末五代及諸國

雜事光憲仕荆南高從誨三世在幕府北夢者言在
夢澤之北也後隨繼冲入朝有薦於太祖者將用為
學士未及而卒光憲自號葆光子

後史補三卷

前進士高若拙撰

野人閒話五卷

成都景煥撰記孟蜀時事乾德三年序

續野人閒話二卷

不知作者

開顏集三卷

校書郎周文規撰未知何時人以古笑林多猥俗迺

於書史中鈔出可資談笑者為此編

洛陽搢紳舊聞記五卷

案文獻通攷作十卷

丞相曹國張齊賢師亮撰所錄張全義治洛事甚詳

也

太平廣記五百卷

太平興國二年詔學士李昉扈蒙等修御覽又取野

史傳記故事小說撰集明年書成名太平廣記

秘閣閒談五卷

起居舍人吳淑正儀撰淑丹陽人

廣卓異記二十卷

樂史子正撰

談苑十五卷

案文獻通攷作楊文公談苑八卷

丞相宋庠公序所錄楊文公億言論初文公里人黃

鑑從公遊纂其異聞奇說名南陽談藪宋公刪其重

複分為二十一門改曰談苑

文會談叢一卷

題華陽上官融撰不知何人天聖五年序

國老閒談二卷

稱夷門君玉撰不著姓

洞微志三卷

案文獻通攷作十卷

學士錢易希白撰

乘異記三卷

南陽張君房撰咸平癸卯序取晉之乘之義也君房

又有脞說家偶無之晁公武讀書志以脞說為張唐

英君房撰又言君房著名臣傳蜀檣杙雲笈七籤行

於世按君房祥符天禧以前人楊大年改閑忙令所謂紫微失却張君房者卽其人也常爲御史屬坐鞠獄貶秩因編修七籤得著作佐郎七籤序自言君房蓋其名非字也唐英字次功熙豐間人丞相商英天覺之兄作名臣傳蜀檣杌者與君房了不相涉不知晁何以合爲一人也其誤明矣

補妒記八卷

案文獻通攷作一卷

稱京兆王績編不知何時人古有宋虞之妒記等今不傳故補之自商周而下迄於五代史傳所有妒婦

皆載之未及神怪雜說文論等最後有治妒二方尤可笑也

祖異志十卷

信陵聶田撰康定元年序

括異志十卷後志十卷

襄國張師正撰

郡閣雅言二卷

贊善大夫潘若冲撰

案晁公武讀書志稱潘若同撰文獻通攷云書錄解題作郡閣

雜言題贊善大夫潘欲冲撰今此本仍作郡閣雅言惟稱若冲則互異

茅亭客話十卷

江夏黃休復端本撰所記多蜀事別有成都名畫記
蓋蜀人也

嘉祐雜志三卷

修起居注陳留江休復鄰幾撰

夢溪筆談二十六卷

沈括存中撰其序言退居絕過從所與談者惟筆硯
而已

茗川子所記三事一卷

不知何人三事者勃窣姑王立林果毅皆異事也未
有韓蟲兒一事是歐陽公所記偶錄附此

東齋記事十卷

翰林學士蜀郡范鎮景仁撰

紀聞一卷

集賢殿修撰李復圭審言撰淑之子也

東坡手澤三卷

蘇軾撰今俗本大全集中所謂志林者也

艾子一卷

相傳為東坡作未必然也

龍川畧志六卷別志四卷

蘇轍撰龍川者循州也

玉壺清話十卷

僧文瑩撰

張芸叟雜說一卷

吏部侍郎張舜民芸叟撰

畫墁集一卷

張舜民撰

洛游子一卷

題司馬光非也所稱樂全子齊物子亦莫知何人

塵史三卷

司農少卿安陸王得臣彥輔撰嘉祐四年進士其序

稱政和乙未行年八十自號鳳臺子蓋王昭素之後

王銍性之之伯父也揮塵錄詳載

蘇氏談訓十卷

朝請大夫蘇象先撰述其祖魏公頌子容遺訓

續世說三卷

案文獻通攷作十二卷

孔平仲毅父撰編宋至五代事以續劉義慶之書也
孫公談圃三卷

臨江劉延世錄高郵孫升君孚所談升元祐中書舍
人坐黨籍謫汀州

澠水燕談十卷

齊國王闢之聖涂撰澠齊水名春秋傳有酒如澠闢
之治平四年進士

烏臺詩話十三卷

蜀人朋九萬錄東坡下御史獄公案附以初舉發章

疏及謫官後表章書啓詩詞等

碧雲駮一卷

題梅堯臣撰以廢馬爲書名其說曰世以旋毛爲醜
此以旋毛爲貴雖貴矣病可去乎其不遜如此聖俞
必不爾也所記載十餘條公卿多所毀訐雖范文正
亦所不免或云實魏泰所作託之聖俞王性之辨之
甚詳而邵氏聞見後錄乃不然之

青箱雜記十卷

朝散郎吳處厚撰知漢陽軍箋注蔡確詩者也後亦

不顯

師友閒談一卷

案文獻通攷作師友談記

李廌方叔撰

劍溪野語三卷

延平陳正敏撰自號遜翁別有遜齋閑覽十四卷未

見

冷齋夜話十卷

案文獻通攷作六卷

僧惠洪撰所言多誕妄

墨客揮犀十卷續十卷

不知名氏

搜神秘覽三卷

京兆章炳文叔虎撰

石林燕語十卷

葉夢得少蘊撰宣和五年所作也

燕語攷異十卷

成都宇文紹奕撰舊聞汪玉山嘗辨駁燕語之誤而

未之見也

玉澗雜書十卷

葉夢得撰攷其中所記亦當在宣和時所作玉澗者
石林山居澗水名也

巖下放言一卷

葉夢得撰休致後所作

柏臺雜著一卷

石公弼撰雜記典故等事公弼本名公輔改賜今名

為御史攻蔡京甚力竟坐深文謫死然本傳言其議

論反覆非純正者

紺珠集十二卷

案文獻通考作十三卷

朱勝非鈔諸家傳記小說視曾慥類說為畧

類說五十卷

太府卿温陵曾慥端伯撰所編傳記小說古今凡二

百六十餘種

春渚紀聞十卷

浦城何遠撰自號寒青老農東坡所薦為武學博士

曰去非者其父也

曲洧舊聞一卷雜書一卷翫說一卷

直秘閣新安朱弁少章撰弁於晦庵為從父建炎丁

未使金留十七年既歸而卒骫骳說者以續晁无咎
詞話而晁書未見

南游記箋 卷

曾紆公袞撰

翰墨叢紀五卷

樞密睢陽滕康子濟撰

鐵圍山叢談五卷

蔡條撰謫麟林博白時所作

萍洲可談三卷

不知何人跋語稱大父國史在館閣久多識前輩著
館秘錄曝書記與此而三兵火散失近得此書於曾
仲存家未題朝奉大夫曄亦不著姓

復齋閒記四卷

承議郎歷陽龔相聖任撰待制原之孫頤正之父也
鄞川志五卷

中書舍人龍舒朱翌新仲撰寓居四明故曰鄞川
窓間紀聞一卷

稱陳子兼撰未知何人雜論詩文經傳亦間述所聞

事

枕中記一卷

不著名氏崇寧中人所載多國初事

姚氏殘語一卷

剡姚寬令威撰又名西溪叢話已板行

槁簡贅筆二卷

承議郎章淵伯深撰始得此書於程文簡氏不知何人作文簡題其後以其中稱先丞相申公知其爲章子厚子孫也余又以其書考之言先祖光祿元祐三

年省試東坡知舉擢爲第一則又知其爲援之孫也後以問諸章始得其名字其人博學有文以場屋待士薄如防寇盜用蔭入仕遂不就舉居長興故序稱若溪草堂淵自號懲窒子序言錄爲五卷今此惟分上下卷

老學庵筆記十卷

陸游務觀撰生識前輩年登耄期所記見聞殊可觀也

夷堅志甲至癸二百卷支甲至支癸一百卷三甲至三

癸一百卷四甲四乙二十卷大凡四百二十卷

翰林學士鄱陽洪邁景廬撰稗官小說昔人固有爲之者矣游戲筆端資助談柄猶賢乎已可也未有卷帙如此其多者不亦謬用其心也哉且天壤間反常反物之事惟其罕也是以謂之怪苟其多至於不勝載則不得爲異矣世傳徐鉉喜言怪賓客之不能自通與失意而見斥絕者皆詭言以求合今邁亦然晚歲急於成書妄人多取廣記中舊事改竄首尾別爲名字以投之至有數卷者亦不復刪潤徑以入錄雖

叙事猥釀屬辭鄙俚不恤也

睽車志五卷

知興國軍歷陽郭彖次象撰取睽上六載鬼一車之語

經鋤堂雜誌八卷

倪思正甫撰

續釋常談二十卷

秘書丞龔頤正養正撰昔有釋常談一書不著名氏家藏亦缺此書今故以續稱凡常言俗語皆注其所

出

北山紀事十二卷

戶部侍郎濡須王邁少愚撰

雲麓漫鈔二十卷續鈔二卷

通判徽州趙彥衡景安撰續二卷乃中庸說及漢定

安公補紀也彥衡紹熙間宰烏程有能名

做告一卷

不著名氏專叙報應

夷堅志類編三卷

四川總領陳昱日華取夷堅志中詩文藥方類為一

編

山齋愚見十書一卷

稱灌圃耐得翁不知何人

程史十五卷

岳珂撰程史者猶言柱記也原註說文程林前几也

游宦紀聞十卷

鄱陽張士南光叔撰

鼠璞一卷

戴埴撰

周盧注博物志十卷盧氏注六卷

晉張華撰其書作奇聞異事華能辨龍鮓識劍氣其學固然也

元怪錄十卷

唐牛僧孺撰唐志十卷又言李復言續錄五卷館閣書目同今但有十一卷而無續錄

瀟湘錄十卷

唐校書郎李隱撰館閣書目爾云唐志作柳詳未知

書目何據也

龍城錄一卷

稱柳宗元撰龍城謂柳州也羅浮梅花夢事出其中唐志無此書蓋依託也或云王銍性之作

樹萱錄一卷

不著名氏序稱纂尚書滎陽公所談者亦不知何人又云普聖園丘之明年普聖者僖宗由普王踐位也書雖見唐志今亦未必本真或云劉燾無言所為也

雲仙散錄一卷

稱唐金城馮贄撰天復元年叙馮贄者不知何人白
言取家世所蓄異書撮其異說而所引書名皆古今
所不聞且其記事造語如出一手正如世俗所行東
坡杜詩注之類然則所謂馮贄者及其所蓄書皆子
虛烏有也亦可謂枉用其心者矣

葆光錄三卷

陳纂撰自號襲明子所載多吳越事當是國初人

稽神錄六卷

南唐徐鉉撰元本十卷今無卷第總作一卷當是自

他書中錄出者

啟顏錄八卷

不知作者雜記詼諧調笑事唐志有侯白啟顏錄十
卷未必是此書然亦多有侯白語但訛謬極多

清異錄二卷

稱翰林學士陶穀撰凡天文地理花木飲食器物每
事皆制爲異名新說其爲書殆似雲仙散錄而語不
類國初人蓋假託也

歸田錄二卷

歐陽修撰或言公為此錄未傳而序先出裕陵索之
 其中本載時事及所經歷見聞不敢以進旋為此本
 而初本竟不復出未知信否公自為序略曰歸田錄
 者朝廷之遺事史官之所不記與夫士大夫談笑之
 餘而可錄者錄之以備閒居之覽也又曰唐李肇國
 史補序云言報應叙鬼神述夢卜近怪異悉去之記
 事實探物理辨疑惑示勸戒采風俗助談笑則書之
 余之所錄大抵以肇為法而小異於肇者不書人之
 過惡以為職非史官而掩惡揚善君子之志也覽者

詳之

歸田後錄十卷

朝請郎廬江朱定國與仲撰熙豐間人竊取歐公舊
 錄之名實不相關也

清夜錄一卷

沈括撰

續清夜錄一卷

王銍性之撰

王原叔談錄一卷

直齋書錄解題 卷十一
翰林學士南京王洙之子錄其父所言

延漏錄一卷

不著名氏其間稱伯父郇公知其爲章得象之姪也
後題此書疑章望之作然未敢必望之者字表民用
郇公廕入官歐陽公爲作字說者也以宰相嫌遂不
仕錄中又記皇祐中與滕元發同試滕首冠而已被
黜藉令非望之亦當時場屋有聲者章氏雋才固多
也

清虛居士隨手雜錄一卷

王鞏定國撰待制素子張安道之婿

石渠錄十一卷

校書郎昭武黃伯思長睿撰

避暑錄話二卷

葉夢得紹興五年所作

臺省因話錄一卷

兵部尙書新昌石公弼國佐撰

思遠筆錄一卷

翰林學士九江王寓撰寓以靖康元年七月以禮部

尚書入翰苑雜記當時聞見凡二十七條寓父易簡以布衣召爲說書遂顯用寓後拜左轄使金辭行謫散官嶺表父子俱南下沒於盜

秀水閒居錄三卷

丞相汝南朱勝非藏一撰寓居宜春時作秀水者袁州水名也

聞見後錄二十卷

邵某撰

侍兒小名錄一卷續一卷

序題朋谿居士而不著名氏始洪炎玉父集爲此書王銍性之溫豫彥幾續補今又因三家而增益之且爲分類其中多用古字或云董彥遠家子弟所爲也紀談錄十五卷

稱傳密居士不著名氏蓋晁公邁伯咎也

賢異錄一卷

亦無名氏所記四事其一曰鬼傳者言王醜家子弟所遇與世傳王子高事大同小異當是一事耳能改齋漫錄十三卷

太常寺主簿臨川吳曾虎臣撰

揮塵錄三卷後錄十一卷第三錄三卷餘話一卷

朝請大夫汝陰王明清仲言撰明清銍之子曾紆公
袞之外孫故家傳聞前言往行多所憶後錄跋稱六
卷今多五卷

投轄錄一卷

王明清撰所記奇聞異事客所樂聽不待投轄而留
也

吳船錄一卷

范成大至能撰自蜀帥東歸紀遊取門泊東吳萬里
船之語

瑣碎錄二十卷後錄二十卷

溫革撰陳昱增廣之後錄者書坊增益也

鑑誠別錄三卷

廬陵歐陽邦基壽卿撰周益公洪景盧有序跋

樂善錄十卷

蜀人李昌齡伯崇撰以南中勸戒錄增廣之多因果
報應之事

直齋書錄解題卷十一

